

DATUAK

Inbestidura, uztailaren 11n

Juan Jose Ibarretxe EAEko lehendakari izendatzeko osoko bilkura uztailaren 11n izango da. Hala ere, hurrengo egunean lortuko du kargua, lehen bozketan gehiengo absolutua behar delako. Bigarren bozketan, hurrengo egunean, gehiengo sinplea nahikoa izango da

Mahaiaren osaketa

- **Juan Maria Atutxa** (Legebiltzarreko presidentea)
- **Gorka Knörr** (lehen lehendakariordea)
- **Carmelo Barrio** (bigarren lehendakariordea)
- **Manuel Huertas** (lehen idazkaria)
- **Kontxi Bilbao** (bigarren idazkaria)

EHko zazpiek bezala. Carmelo Barriok Knörrrek baino bat gutxiago bildu zuen, 32.

IUK abstentzioarekin jakinaz nahi zuen Mahaiko eserlekuak alderdi bakoitzaren eserlekuen arabera banandu behar zirela, EH kenduta.

Horregatik lehen idazkaritza hartu beharrean bigarrena eskuratu zuen Kontxi Bilbao. Lehena eskuratzeko arazorik ez zuen IUK, EAJ eta EArekin batera boto nahikoak zituelako. Hala ere, Huertasek baino bi boto gutxiago bildu zituen IUKoak (32-30). Jon Salaberriak bere taldeko zazpiak jaso zituen, bat baliorik gabea izan zen ('Kontxi Madrazo' bozkatu zuen), eta bostek boto zuria eman zuten. Horri esker IUK bere asmoa bete zuen.

Otegi eta Egibar

PPko eta PSE-EEko eledunek ez zuten adierazpenik egin nahi izan bilkuraren ostean, esan beharreko guztiak bezperan adierazi zutelako. Joseba Egibarrek eta Arnaldo Otegi, orde, euren ikuspuntua azaldu zuten. EHkoak esan zuen beste alderdiek ezker abertzalea «baztertu» egin dutela, eta jeltzaleak ukatu egin zuen hark esandakoa.

«Bazterketaren aldeko hautua egin dute. Horrek islatzen du batzuen jokabidea. Gaur hemen Ajuria Eneko Mahaia ordezkatu da», esan zuen EHkoak.

Joseba Egibarrek EHren parte-hartze ereduarekin lotu zuen Eusko Jaurlaritzako alderdiak IUren alde agertu izana. «EH Legebiltzarretik joan zen esanez hau ez zela beraien jokalekua. Orain izango direla esan dute, baina ez dakigu egunero izango diren edo noizbehinka. Eta erakunde honetan egunero egin behar da lan. Horregatik azaldu gara IUren alde eta ez da bazterketarik izan», esan zuen.



MIREN SAEZ

IKUSMINA. Hedabide askoren arreta erakarri zuen legealdiaren hasierako bilkurak.



MIREN SAEZ

OTEGI ETA IBARRETXE. Arnaldo Otegi bozkatzera bidean, Juan Jose Ibarretxe eta Idoia Zenarruzabeitia hizketan ari ziren bitartean.

Genioen bezala...

HASIERA. Zazpigarren legealdian gaude, baina seigarrena da. Bataren eta bestearen artean etenaldirik izan ez balitz bezala jokatzeko ari da EAJ-EA



MIREN SAEZ

NOIZ DEITUKO ZAIN. Aretoan sartu aurretik norbere izena noiz entzungo egon ziren legebiltzarkideak. Argazkian, Jaime Mayor Oreja.

Felix Iriarte | **GASTEIZ**

Garaiz sartu ziren aretoan EAJko eta EAKo legebiltzarkideak. Eguerdirako zen hitzordua, baina ordubete lehenago han ziren guztiok, legealdiari hasiera emateko irrikitan, denbora urrea balitz bezala.

Aurreko legealdia behar bezala ez zela amaitu, eta atzo hasi zena aurrekoaren bigarren zatia izango balitz bezala heldu diote Juan Jose Ibarretxe lehendakariaren alderdikideek. Agian horregatik EAJ-EAKo kideak izan ziren lehenak akreditazioak aurkeztean. Eta horregatik lehenak izan ziren atzo Gasteizko Legebiltzarrera sartzen.

Ibarretxe guztion artean lehena. Bere taldeko burua izanik, berari zegokion hasiera ematea. Gero beste 32ak. Haien atzetik sozialistak, popularrak, EHkoak eta IUKoak. 75 guztira, inork ez baitzuen hutsik egin.

Nicolas Redondok ere ez. PSE-EEko burua Legebiltzarrera sartzen azkena izan zen. Hamabiak ondo jota zeuden, Atutxa EAJ-EAKo parlamentarioak deitzen ari zen, eta oraindik Redondo falta zen. Legebiltzarrera sartu eta bere izena entzun zuen. Minutu bat geroago eta txanda pasatuko zitzaien. Eta ez dago bigarren aukerarik, hurrengo bilkura arte ez zen parlamentarioa izango.

Jaime Mayor Oreja PPkoa azkarrago ibili zen. Ez askoz gehiago. Izan ere, hamabiak jotzen ari zirenean sartu zen aretoan. Batek daki, agian kazetarietara izkin egitea nahiko zuen. Ez zuen lortu, *El Informal* programako Tele 5 telebistako kazetaria zain baitzuen. «Hemen ere bai?», galdetu zion PPkoak.

Arduratuta zeuden PPkoak ordurako. Telefonoz deitu zioten jakiteko non zegoen —autoan zetorren ordurako—, eta lasaitu ziren haren erantzunarekin. Carlos Iturgaitzek hartu zuen Legebiltzarreko atarian.

Lehenago iritsi zirenek elkar agurtzeko aprobetxatu zuten. Gehiegi nahastu gabe, zauri dialektikoek uste baino min handiago egiten baitute. Hala ere, han ziren kafe baten inguruan Jone Goirizelaia eta Jose Antonio Rubalkaba kontu kontari edo Juan Mari Juaristi eta Joseba Alvarez elkar agurtzen.

Javier Madrazo pozez gainezka zegoen. Hiru parlamentariorekin Jaurlaritzan sartzeko aukera izango du. Talde parlamentario propiorik ez du izango, baina talde mistoaren bulegoa berarentzat bakarrik izango da. UAKoek alde egin dute PPrekin egoteko, eta Enriqueta Benitok gonbidatuen aulkitik segitu zituen bozketak.

Aretoan Atutxaren txanda iritsi zen: «Nire lehen hitzak aurreko legealdiko bukaeran esan nituenak izango dira...».